

奉化縣志

卷三  
卷四



奉化縣志卷三

知縣 汶上曹

含山唐宇霖

重修

安慶桐城陳 琦編輯

教諭錢塘汪文濠校正

水利志

民生本計全在水田水何利去其害而已奉水  
東注勢迅而易涸且連山杉嶺漲流暴下漂石  
壞廬故昔賢為坊庸以捍衝激之勢作礮閘以

奉化縣志

卷之三

水利志

一

備蓄洩之利灌溉攸資舟楫是賴可不以時修  
築乎但折水通渠功莫大於資國堰而捍水迴  
流利莫切於倪家常浦二堰蓋資國為諸河之  
咽喉而倪家常浦則尾閘之洩尤時賢之所當  
究心者惟在上者視民事如家事在下者視公  
事如己事官民均殫心竭力斯害去而利興矣

志水利

張司馬

時徽

曰奉阻山瀕海水皆下流灌溉所資

固不能一一盡利也靈濟泉發於龍潭而流於



城南爲大堰聚堰以溉田西錦溪發於石棋盤山而流於城中爲吳勝堰以灌田三溪發於梧桐坑由顏婆橋而出小溪發於邱家山由歲穰橋而出以灌田葉家溪發於日嶺山由唐家畝至青錦橋爲小堰以灌田至城東一南流爲方勝磯以灌田一北流爲鶯鴨磯以灌田此附邑之流專利郭田者皆流入於縣溪縣溪發於鎮亭龍潭至大萬竹爲大堰出三十里爲朱家堰至廣渡爲新城堰而大嶺下溪黃甘嶺下溪皆

奉化縣志

卷之二

水利志

二

合流出西溪至龍潭灘爲資國堰引水入河分二派一由南山下注蔣家湖由舍墟村抵長塘河爲新溪堰以入後洋河有考到磯以折之一入潘家斗又分二派一注萬壽湖爲土埭堰達長浚短浚由司馬橋抵趙家斗有鄭家堰以堤之由市河注廣平湖抵新河有斗門堰以堤之其流皆入沈家庄河溉田不下數千頃

雍正六年

奉 憲開斗門堰合後洋之水以入沈家庄其利愈普

然資國堰港口沙每壅塞

而流之所入者微尤不可不以時濬導者也自

龍潭灘而下由新橋惠政橋金沙灘長汀至金鐘壑有倪家磨以節水入新溪而達沈家庄河與後洋河趙家斗新河水合有陳埠頭磨以節水由陳埠頭磨而出柏樹港自金鐘墩而下由栗樹塘至六板橋爲引水小閘分入內河流朱家河蔣家浦王叙浦入趙河自六板橋而下至南渡有進林磨閘以節水達柏樹港又一由鄞塘橋馬石灰橋爲內河出坊橋壩與柏樹港水合流於方橋江自南渡而下由常浦入趙河達

於江口合於剡源溪而爲江銅山東溪流西圃泉井水出墩頭仁湖水出塘下合流於范家河江潮往來其間故爲柳公磨爲周長官磨所以捍鹵而儲淡也雙溪一發於杉木嶺由排溪葛嶼遶梅山西而出一發於山隍嶺與湖潭嶺溪鮎埼嶺溪合流於方門遶梅山東而出爲雙溪至睦州嶺合流由後潭報國橋至童橋爲黃莊磨其流入白水等村而復合於溪又下則爲湖芝磨其流入長塘後洋蓋黃莊湖芝二磨利

澤甚溥所宜勤於修葺者也自湖芝磯而下由楊家潭至下鄆橋又爲蔣家堰壅流而入汪家浚自蔣家堰而下由溪壩王家滙李家灣至廟山東出西鄆居敬橋金溪發於金峩山東北入白杜河蔡橋合流於居敬橋出柏樹港土平水溢不必磯堰而自可引灌者也剡源溪發自剡界嶺由六詔驛駐三石至康家嶺凡九曲至公棠與晦溪水合有公棠堰自公棠堰而下由溪口至畸山與上元溪蔡家河合自畸山而下至

泉口與杜嶺棠溪流入白作洋乾溪水合自泉口而至江口與范家河趙河水合又下與坊橋江水合而滙爲江是勢雄而汎濫漑濟甚溥者也總而計之西南諸水自澗入溪自溪入河而盡歸於東北爲奉化江若珊嶺以南新嶺以東皆爲海壤溪流不聚廟山磯以制楊塢水史家磯以制戴家山水黃公堰以制甘嶺水小堰以制大同水皆隨水勢而引利於田也黃蘗溪發源於金峩山西南由浚沮至天門注海松溪發

源於鄞菩提嶺東行注海葦湖水發源於九峯  
由吳家埠注海延納儲積則在三農自力耳至  
若溝池泉澗坊壩圳港苟漑於田罔非水利而  
局小利微亦何能一一盡詳哉

〔明豐坊水利圖記〕甯波府屬縣五其三曰奉化  
奉化縣屬鄉八東北曰奉化鄉宋儒舒文靖公  
璘生焉西南曰連山鄉鄉有鎮亭山山有龍潭  
南曰松林鄉多松東南曰忠義鄉漢夏黃公晉  
祖域廟食茲土鄉是以名東曰金溪鄉有山曰

奉化縣志

卷之二

水利志

五

金峩北西曰長壽鄉有燕巖社燕所集北曰禽  
孝鄉昔飼燕之女死燕死其塚故名山有日嶺  
雪竇隱潭之勝故左拾遺戴德彝侍郎宋琰皆  
其鄉人西曰剡源鄉其名山曰丹霞曰徐島曰  
黎洲曰公棠嶺曰六詔晉王右軍羲之所隱也  
縣之水惟十溪四河大溪最大大溪之水發源  
於鎮亭之山亦曰鎮亭水亦曰縣溪繞連山奉  
化松林長壽諸鄉北流出柏溪經牢巖至縣西  
南曰西溪經龍潭浦歲穰橋東北流曰龍溪西

南流曰南溪又北滙爲靈濟泉其北曰北溪大  
溪水由綠荷灘至會通惠政二橋北下長汀爲  
七十二曲其支流自新橋東經資國堰入萬壽  
湖又東歷司馬橋廣平磧鄭家堰以會於沈家  
莊之水南溪自城西下三溪繞縣南顏婆橋至  
方勝磧入於縣溪或自邱家山過歲穰橋至方  
勝磧入於縣溪北溪出日嶺下葉家溪繞於縣  
北文昌橋青錦塘滙流慶登橋至方勝磧入於  
縣溪西錦溪自華頂山石棋盤過縣前嘉會橋

與北溪環亦曰腰帶水東至方勝磧入於縣溪  
皆合北渡江入於海剡溪九曲自大詔蹕駐兩  
湖柏溪三石茅渚斑溪高輿公棠逾泉溪會於  
三江口達北渡江雙溪二源西自杉木嶺南自  
鮎埼嶺北行十許里始合出趙河達北渡江金  
溪自金峩山入新嶺至白杜河出常浦磧入北  
渡江黃檗溪自金峩山向西南至降渚過天門  
山注裏港海棠溪自杜嶺黃甘嶺至南屏山下  
合流過文明橋經剡溪下三江口北渡江松溪

自鄞菩提嶺下東入於海蝦魚潭蓬萊後萊山  
谷間南與石樓山烏潭相望東爲東山至沙井  
北直安巖山白巖窩皆早曠雩禱之所其流繞  
松林金溪二鄉溉田甚溥出於富灞港與鎮亭  
水合而入於江趙河唐縣令趙察闢溉長壽鄉  
田八百餘頃白杜河亦闢於蔡溉金溪鄉田四  
百餘頃范家河通江潮溉田四百餘頃市河漫  
不知其始元知州馬稱德李樞濬之下斗門達  
北渡水行六十里甚利縣地多山多沙壤舟車

罕達於四方氓惟農之力天不雨則鞠爲赤野  
故水利爲急諸鄉磳堰若奉化之方勝磳陳埠  
頭磳廣平磳資國堰土埭堰鄭家堰連山之大  
堰和尚堰朱家磳松林之松洋堰黃家磳金溪  
之湖芝磳唐家磳長壽之陳家磳進林磳車耆  
堰禽孝之大堰湖清堰馬家磳柳公磳周長官  
磳剡源之公棠堰皆食利之民歲時修築若奉  
化之會通倪家二磳則役於公家之稅惟一邑  
要害莫過是今僉憲西蜀朱公子和奉敕來浙



治水利克宅厥心於乃職則下令曰吾奉天子命夙夜兢兢惟風猷罔宣是懼咨爾守令其具言水源之來洩興修之利害工力之公私蒼萃成編俾蒞斯者執此以往知縣錢侯璠奉令惟謹按圖志進父老而詢之乃繪其大都各繫以說而屬余總記其事余方臥病辭弗可遂記之

河

龍津河 縣東二里王杏濬龍津河記龍津河去縣東二里許與大江相接縣之西南諸川攸歸

奉化縣志

卷之三

水利志

河

八

焉誠上游也國初堰壩修復河流吞吐人才民俗商貨農疇爲一郡稱首天順成化以來水分河室風物視昔亦少殺而舊蹟遺曠猶有存焉者正德十二年朱侯豹之任巡郊問俗相土度川慨然曰邑之風氣視茲河通塞汚隆係焉可不急諸移申獲允甫謀經始而侯以調劇去吳侯檟繼之托言修理而志不在民厥功用圯以後懲噎廢食視若末務而河之不可追復也數十年於茲矣嘉靖十三年錢侯璠下車屬耆訪

故知是河之當急也率於水滸而廉視之則見河之故流湧湧已爾河之故址廓廓已爾壅而滯滙而汙者塊焉均焉已爾侯毅然曰河之塞也有塞之者藁莽而墟沙礫而蹊也河之通也有通之者墟而港澮蹊而泉流也奪民可以濟民仁者亦爲之况因其故而利導焉者乎用是申上俞如使民躍如改倪家礮爲堰鑿南渡蕪塞割民侵地濬金鐘等溪築亂作洋爲同山土壩方橋亦設壩支流有防而水由故道盈則注

縮則停涸則引潮之入滂則任潦之出是故自新橋至長汀達北渡順流而下浩如也時改建浙東道連山驛成耆宦周君相輩請記於予予以菲薄辭逾月而茲河就緒又以記請予曰是非修公廨類也可以記矣廨舍之修一時一事之便茲役也有五利焉有三善焉官之所役者民民之所艱者夫徒之苦代馬步以舟楫而官不勞於催督民得宴於息肩其利一也程迂而商賈困有舟矣朝登流而夕抵舍自是行旅願

出於其途而僻地漸成通衢其利二也長壽等鄉被溉田數千頃水旱無患其利三也洪流巨浸環據上游而山川聯襟帶之美其利四也漾之以秋月濯之以春濤停蓄深而流布遠必將有異才出焉以應谿山之靈與茲流相澄霽其利五也且昔之濬河也以言今之濬河也以行昔也逾年而事不成今也期月而功卽竣非至斷而能之乎凡民可與樂成雖與慮始河之始事也民不以爲難蓋投之以變通之會而協之

奉化縣志

卷之二

水利志

河

十

以眾論之同公焉已矣撥夫以徭役給餉以公帑有不瞻捐俸助焉不加以分外之擾而循行慰勞戒以弗亟藹藹乎有如傷之視則仁者之爲也斷也公也仁也是謂三善三善者善在侯者也五利者利在民者也非善無利利洽而善斯溥矣非利曷善善行而利斯永矣信非解舍之便於一時一事比也可以記矣周君輩再拜而謝曰盡之矣請鑄之石以遺來者遂書以卑之立石以爲之記

市河 縣東南五里卽新河又名新渠唐陸明允  
導大溪水由資國堰注於市橋河循三山爲廣  
平湖下爲斗門通鄭家淫至沈家庄入縣溪元  
知州馬稱德開浚瀦水溉田數十萬畝又通舟  
楫以便往來事見袁桷記後復湮塞農商皆病  
知州李樞復開有楊彝記今其故道壅塞久矣  
袁桷記言至名山厯進林常浦車耆三磳以今  
考之乃趙河於此不合宜改正之袁桷新河記  
奉化諸溪至龍潭畢會汪洋衍滙陂塘澗溝合

奉化縣志

卷之二

水利志

河

十一

流赴資國埭紆行凡六十里始達於江歲霖雨  
不時溪江相迎上下交射漫流田堤或漂民廬  
舍昔之爲政者懼焉於是築埭善防潦至則泄  
旱則瀦以灌輸由資國埭注市橋循三山爲廣  
平湖凡言湖通畝澮也湖之下有斗門必嚴其  
水則至是通鄭家淫古有陰溝或謂淫溝皆取  
以達水今言淫言之訛也溪至是循名山稍折  
爲楊橋水以折始善行將達江復限之爲置閘  
曰進林曰常浦又益限之以埭曰車耆提閘有

程則水旱不病今之善吏治者拳拳奉公上不  
自保政不能及此廣平馬侯稱德至州則曰皇  
元升江南縣爲州實祖戶口戶繁租瘠何以稱  
綏惠田疇蕪闕茲惟殿最吾視茲土抑溝洫漫  
滅以害吾民耶遂窮上源首資國耆老咸言市  
橋達車耆有故河往歲舟楫聯絡今趨江以行  
驚濤駭浪商賈不赴而市用益匱濬廣復舊則  
民其有瘳遂遵市橋至陳橋具畚鍤表深廣未  
及終日而遺石斷圮舊跡儼著至何家埭或曰

是郡乘不登積爲豪民利水至是當行何障固  
焉於是決堤仆石埭復置卒守水門亦如之易  
資國埭爲水門亦如之別立小柵以謹通塞廣  
平增斗門志舊有贍卒租亦如之昔之言紆行  
六十里皆得舟行以達於江矣史遷作河渠書  
能吏所紀僅一二數謝太傅淮南水利博濟則  
自方之以召伯謝公偉功迄今不廢馬侯政良  
近矣延祐庚申記楊彝重開新渠記至正二十  
一年辛丑夏河東李侯之知奉化蓋期月矣州

上下與大小民翕然以定暴強讐息柔弱獲伸  
侯時以公事詣會或浹旬經月則民俛俛然如  
失怙恃比還則相顧動色於是知侯之得民心  
也深矣父老欲列侯政績刊諸樂石會五月炎  
暑蒸溽雨澤未應侯切切爲民憂之禱於山川  
夙夜靡甯既六月大雨頻降禾黍徧野謠謠之  
聲徹於四境乃相與言曰吾州固巖邑也谿流  
迅悍盈虛靡常故旱乾水溢歲爲我田之病如  
新渠之開侯爲吾民之慮遠矣如使前日之旱

而工未就闢則遠渠之田焦槁久矣雨雖後至  
其能及乎利澤悠長烏可無紀乃來謁拜而刻  
之按州東南五里資國埭分大溪之水別於支  
港東流於市河又紆行六十里而達於江所溉  
民田三萬七千餘畝而市河卽今所謂新渠是  
也其來久矣國朝至元丙子至延祐庚申四十  
五年渠自市橋以北湮塞其故利知州廣平馬  
侯稱德嘗一浚之集賢直學士袁公爲記可考  
也自庚申至今又四十二年渠之湮廢益甚而

李侯復開之其廢興豈有數耶侯自始視政詢民之利病而知渠之當治有不能已者顧憫人之勞而重其費久之而猶不忍爲言然民知其意曰是吾利也則驩然向之侯於是下令計徒庸戒胥吏無敢弗虔而民亦乘農隙率丁壯分任土方以相先後操畚負鍤其來如雲疏去惡壤洎於瓦礫塗手胝足不避艱苦慮後懲前功勤在昔其廣三丈至五丈隨地爲斷其深二丈視舊有加焉由市橋至車耆耆三皆重築之建

奉化縣志

卷之三

水利志

河

古

以貞木甃以密石縻舟上下可久無壞爲溪者二曰進林曰常浦亦時察焉以嚴其水利而資國之源滌治爲謹由是坊墉以固蓄洩有時水路所通循三山歷廣平湖下斗門皆復其故而滔滔安行以達於江矣始事於春正月壬申而畢於二月丁未積工萬五千有贏而公家之費不豫焉先是使客之至也州役民迓於北渡節傳相踵民老弱交跡於道蓋不勝其困也及茲舟楫往來叫囂不聞然則是渠之開不惟備溝

洫廣灌溉而通商惠民達政教省勞費其爲民  
利溥矣且當庚申之役侯之先公松江府君諱  
恭時同知州事實佐馬侯以倡是畫而朝夕董  
事其功爲多故公至是不忘先美尤究心焉傳  
所謂善繼人之志善述人之事者在侯有之然  
余聞昔鴻隙之壤黃鵠興謠鄰旁遺利四門見  
譏抑水利之開塞而生民之休戚係焉任司牧  
之寄者誠勤乎如是李侯之績其可遺乎矧當  
寓縣多故師旅供億調發煩重期會急促侯能

奉化縣志

卷之二

水利志

河

圭

處以閒暇無乏軍興而覈墾田造驛舍繕州治  
興募兵皆序舉而於民也煦嫗撫摩則惟恐傷  
之故其德化所感震雷殛虎麥秀兩岐其可書  
者眾矣惟是重農事興大利以紹前人之休於  
斯渠也有以見侯之志業則垂後勸功尤不可  
沒也故余不讓而特書之侯名樞字元中河東  
隰州石樓人讀書有文藝所至以循良聞

趙河 縣北二十五里自常浦至王董二堰皆趙  
河也唐元和十二年令趙察開浚漑長壽鄉民



田八百餘頃邑人德之因以名河

白杜河 縣東三十里唐元和十四年令趙察開

溉民田四百餘頃

萬家河 縣北十里通大江溉田四百餘頃歲久

淤塞萬厯丙辰縣令賴愈秀同鄉紳宋宗周重

開崇禎初年復淤吏部戴澳捐田復浚縱廣倍

前始通舟楫因剗埠行舟自埠至石坡嶺砌路

十里水口鑿九曲築三山水通甯紹陸接台温

爲南北孔道今湮

奉化縣志

卷之三

水利志

河湖

六

湖

萬壽湖 縣東四里卽新婦湖本縣放生之處又

各放生湖至元丙子置取資國堰水入湖闊一

十丈長一里許溉田三十餘畝延祐間知州馬

稱德浚之至正二十年知州李樞復開之

廣平湖 縣東北五里一各寺後湖元至元丙子

置取資國堰水入湖溉田二千餘畝知州馬稱

德李樞俱開浚爲利甚溥

葦湖 縣東南五十里宋紹興間置積水溉田八

百餘畝亦名蓴溪因產蓴故名世傳張瀚避地於此旁有興化寺碑乃瀚書爲鄉人相爭碎之仁湖塘 縣東北十里三面阻山中環四五里爲平地宋紹興間置爲湖瀦水深四五尺北爲塘置閘洩水溉長壽鄉田千餘畝

堰

沙堰 縣東北一里宋待制仇愈因沙堰伐石爲礮沾利者二十七里常加修築旁有仇公祠陳居仁仇待制善塘記士大夫行己立身懷德抱

奉化縣志

卷之二

水利志

湖堰

七

義固無歉於已矣而其用舍之間皆有功及於世當其德之盛也世旣我用澤利及人苟爲不用則隱居田里獨善其身而其道德之光英偉之風有足感動人者人莫不尊慕而愛敬有所欲爲則不令而行不勉而勸此雖無位可居而功業亦有及於人也故通議大夫徽猷閣待制寶文閣學士兼沿海制置使益都開國伯仇公諱愈字泰然青州益都人大觀三年登科第歷官爲縣令者三襄之鄧城懷之武陟密之高密

而爲郡守者亦三知明知盧知潭又復知明其  
宰縣也皆有善政爲人明敏內寬外嚴剖判如  
流事無淹夕民至懷餅餌以俟遣決秩滿則耆  
幼遮泣數日不得去紹興初知州治道總大綱  
而不疎嚴而不苛吏民皆安州罹兵火學宮州  
廨一時重建不取一毫於民而成歲歛發官儲  
以賑糶人得全活者甚眾朝廷聞之進秩一等  
居再歲召至闕旣進對上親加褒諭紹興四年  
冬公帥淮西劉豫之子麟導金人入寇陷壽春

奉化縣志

卷之二

水利志

堰

六

公欲襲取復之密料盧壽兵得數千益鄉兵二  
千出奇直擣壽春城下三戰賊皆北却走渡淮  
俘馘甚眾獲器械數千焚糧船百餘艘并得其  
僞檄上之又降渤海首領二人數日麟復益以  
步騎數千金兀朮爲之殿公追敗之合肥之北  
以克復守禦功加待制命辭有隱若長城之語  
時湘中洞獠未息乃進直學士爲湖南安撫使  
知潭州值巨寇楊公方平州邑蕭條民恃山險  
盜鑄縋環驚眼輕惡不可用公私病之下車一

日其民素聞風采不戮一人而物價平錢弊息  
商賈通民方悅公之臨而服其政數月又召還  
職爲陝西都運使而金人無故歸侵疆詭計叵  
測公獨具奏力陳信之非計大臣以爲異已故  
有清湘之謫凡七月起爲河南府未行金果渝  
盟失所歸郡邑如公言乃復待制再知明州兼  
沿海制置使民間之歌載道公蒞事如舊不  
自表襮復舉鄉飲酒禮酌古今之宜務從簡省  
上下益以爲便思以清白傳家捐已田一百六

奉化縣志

卷之二

水利志

堰

九

畝歸於郡庠以爲每歲牢禮費蓋明之學者自  
是歲時得舉行盛禮明幼長厚人倫敦龐和輯  
之風由此起興諸生德公之賜無窮立祠於郡  
庠以久其傳公守明凡三年滿秩辭有風痹之  
疾閒居五年辭益固以左朝議大夫致仕雅愛  
奉化山水之秀因寓居於長汀之曲而鄉中望  
族民間俊秀覩公德量風度莫不以公爲儀表  
一有冒爲相與媿咎曰何以見仇公焉其風化  
及人可爲盛矣而公所居長汀東堤數里之間

流多曲折而淫雨潦漲故堤不足以捍橫流肆其衝激民居墊溺禾稼被傷歲間有之公與鄉父老輩謀修築堤塘約計七百餘丈南至岳林寺北至金鐘鑿公言一出鄉之士民操畚鍤而輸力爭相率而至不浹旬而告成初不待有司縮法而然也又於堤塘北伐石爲磳名曰沙堰磳以通田澗故溝澇則殺其水勢之奔災旱則資其清流之灌注於是宅土者得其安耕田者得其利功之所建遠且大矣紹興十六年公歿

越明年父老於塘之曲立祠繪像以奉名其祠曰善塘祠以其能禦捍流爲善流又嘉其善作善成善始善終也厥後民間凡遇水旱蝗疫禱無不應益見公之精爽雖死亦爲庇休於民也嗟乎士不用則已用則上匡於君下濟於民竭其志之所爲而無違道干譽之私焉此固士君子之道也今觀仇公以尙古通時之長才宰縣知郡之善政所至皆有赫赫功固無負於所學矣而退居窮處使鄙朴之俗化成淳厚古循良

者所未聞况片言出而七百丈堤塘不日而成其興利除害之功信乎不分用舍之間矣宜乎一鄉之民久而不能忘也公宰縣守郡之事跡卓卓在人耳目稼軒辛公筆於墓誌詳矣而記載國朝之典者亦將書之今第據其梗槩餘不具述鄉人晏琦等咸感成塘之善欲刊石以垂不朽請余記其事固辭不獲遂爲之記

斗門堰 縣東北一都舊爲斗門閘源自資國堰元延祐七年知州馬稱德改築爲堰灌田數千

奉化縣志

卷之二

水利志

堰

廿

畝 國朝雍正二年舒陳二姓爭堰水訐訟歷黃魏王三邑令勘議申憲改築石壩爲二洞分流灌溉俾各姓均沾水利永杜爭端壩於六年築成

吳勝堰 在坊隅卽吳家小堰溉田六百餘畝  
土埭堰 縣東三都唐天祐三年開國子鄭準所築堰左有祠

資國堰 縣東南三都源自鎮亭元至治元年知州馬稱德以舊堰卑狹拓地浚之仍置碶閘以

便瀦洩溉田三萬八千餘畝萬壽湖廣平湖皆出於此

廣平堰 縣西南十里坐四都四圖舊名普平港口開水接鎮亭之源黃馬潭口下注資國堰溉田甚溥元時鄉人爭水訐訟縣令丁濟判定堰石尺寸置閘開閉酌田多寡分水與之今世遠年深洪水翻變水道既遷田亦多沒今昔已殊堰之更築不知凡幾總之在上者各得沾利溉田在下者不得決防洩瀉

奉化縣志 卷之二 水利志 堰 三

鄭家堰 縣北一都舊名鄭家窰水通資國堰經新婦湖元延祐七年知州馬稱德改築為堰溉田數千畝通舟楫於市河今廢

新城堰 石砥堰 俱縣南十五里上下相次接黃馬潭尾水出鎮亭溉松林鄉田

松洋堰 縣南十八里元至正十三年知州李樞修築溉十四都一圖田

戚家堰 縣東南十五里取雙溪水元延祐七年知州馬稱德置高三尺石砌三層長三十丈闊

六尺兩旁用木椿石條甃砌於堰之上畔開河一條闊一丈五尺長四十丈深六尺溢則過堰淺則入河溉十四都田五百餘畝至水澗橋分派爲四一入三都溉田八百畝二入芝湖磧溉田三千餘畝餘入長塘畝等處溉二都三十二都田二萬餘畝

和尚堰 縣東南十五里元知州馬稱德重修溉十四都鄉亭坂楊公橋田三百畝

黃莊堰 縣東南十里宋崇甯間置元至正二十

奉化縣志

卷之三

水利志

堰

三

三年知州李樞更石爲磧橫五丈高一丈石柱六上三堰俱在十四都

雙溪堰 縣南十五都元至正二十三年知州李

樞重修

橫澣堰 縣南二十里

江家塘堰 縣南十七都已上二磧金谿鄉水注於海

大堰 聚堰 縣南半里取靈濟泉水接方勝磧宋政和間令周因置



連山大堰 縣西南七十里水出鎮亭灌溉甚溥

朱家堰 縣西南三十里水接鎮亭

名山堰 縣西四十六都元至元間置洪武九年

縣丞喬鑑率里人重修築

大堰 湖清堰 洞潭大堰 縣西七十里明成

化初里人單叔軒鑿巖通剡溪水溉田八百餘

畝

黃家堰 縣東三十二都先是築堰以捍沙壅屢

圯屢修明嘉靖乙未通判張源重築

奉化縣志

卷之二

水利志

堰

齒

高大堰 縣北六十里宋璧築

橫溪堰 縣東北三十一都元延祐七年知州馬

稱德修築溉金溪鄉田三千餘畝

孟婆堰 縣北三十六都元延祐七年知州馬稱

德修溉田三千餘畝

宣家堰 縣北三十五都元知州馬稱德修溉田

三千餘畝

洙葭堰 縣北二十里 鎮波堰 縣北二十里

車耆堰 縣北三十五都積水以通舟楫官設壩

夫

黃埭堰 縣東北三十一都元知州馬稱德修築  
溉金溪鄉田三千餘畝

歸家堰 縣北三十六都元知州馬稱德重修溉  
長壽鄉田三千餘畝

宣門堰 牌門堰 了角堰 廟前堰 磯後堰

俱在北三十六都

上下許家堰 縣北三十九都

牢巖堰 縣西南十里十一都明崇禎末杭人凌

奉化縣志

卷之三

水利志

堰塘

莛

塘

震寰藉堰水激輪作碓磨舂木爲香并溉田禾

沙塘 縣東一里由市西鴨綠橋南一里許捍北

流青錦塘之水至方勝磯明萬厯間里人孫銀  
等築

青錦塘 在青錦山下其上爲後溪水泛漂田文

庫亦洩前人築塘障水使遶縣城半歸南由慶

登橋入龍溪半歸北由科甲橋而下溉田此宋  
令謝鳳故蹟也 國朝順治十一年縣令王奐

築堤康熙十年縣令鄭愷又增築之乾隆二十三年重修郡守史尙廉重修護城溪河記畧歲在柔兆困敦予守明州明年按屬邑至奉化第見環城三隅皆溪流冷冷岸沙彌望邑大尹陳君滋謂予曰此護城溪河也源發於縣西北之日嶺納功節雪壤華頂諸山水注葉家磯達分水口一南流慶登橋匯方勝磯入大溪一北流科甲橋達范家河五代宋元嘉間邑令謝公鳳濬溪建磯凡橋閘堤塘類皆次第經營澇有洩早有瀦溉田五千頃有奇嗣後修濬者宋紹熙中陳君耆壽元至元中丁君濟自明迄今歷久不治山水暴漲沙礫隨橫潦下壅塞成陸水失故道北城適當其衝霖雨浹旬則決堤嚙城蕩廬沉灶偶亢暘則流絕土圻田石禾枯向號爲膏壤今積爲荒坵矣予曰三農九穀水泉是資顧使其旱澇無備伊誰責與昔魏文侯時發民鑿十二渠引漳水灌田民有難色西門豹曰今雖患苦百年後當必有思吾者其後渠成民

民卒利賴之是豈可恤微勞忽遠籌也於是偕陳君沿溪審視度材經費博詢縉紳父老邑人咸喜願致其力近者助工遠者輸料伙錢二千四百餘緡諏日援方畚鍤雲集濬河自方勝磧起至分水口一百二十二丈分水口繞北至科甲橋八十二丈又繞西至葉家磧止一千三百二十一丈補築青錦塘至鳳翼尖樟潭兩岸石礮共一千四百七十餘丈經始於乾隆二十三年孟冬閱一歲而告竣港既深泓堤亦隆固潰

奉化縣志

卷之三

水利志

塘 堤

七

泛無慮旱乾有資水澤美土田腴斯誠百世之利也

龍潭塘

縣東南五里乾隆間令陳滋修築

堤

周公堤

在栗樹長汀二塘之內先是長汀水衝

決土田乃爲堤於塘內以捍之明宣德八年水復爲害邑令周銓重築之夾堤植柳以憇行者民德之故稱爲周公堤

磧

方勝磨 在慶登橋南縣之東北溪水皆會於此  
潦則由磨出旱則引而南行幾一里東北折入  
大溪南宋元嘉中令謝鳳置歲久而圯宋紹熙  
中令陳耆壽復築之有王時會記至元中壞於  
洪水令丁濟重修明王時會方勝磨記奉化西  
南阻山其水曰靈濟泉曰白石堰曰葉壩皆東  
注逆流以合於溪自昔障而北之以灌西圃洪  
村之田三千畝有奇方勝磨既廢垂百年水失  
故道比歲無年邑人數議復之或搖於異論或

奉化縣志

卷之三

水利志

磨

其

阻於重費及是天台陳侯爲郡丞治用家法務  
舉其職入阡陌間問父老疾苦凡郡之水利皆  
以次蒐舉而方勝磨始克有作廣桑三十尺醜  
爲水三道北行重爲二閘以折之入於西圃洪  
村又七里亦爲二閘以節之入於江益濬河十  
里築兩潰堤合五十丈有奇始於紹熙四年之  
十月迄於五年之五月而成屬歲大旱洪村西  
圃之田當先受其害獨有瀦水已而雨大至奔  
流咸沸桔槔雷發農人奏功綠秀布野民大悅

以爲有生未始得也凡費金錢一百五十萬米  
百斛請於常平者一發於公帑者三得於民者  
五助於趙繪徐如松何渙者一以主簿黃君子  
善爲賢俾治其役且又擇邑之能者趙繪徐如  
松戴日宣何渙以授成焉民信事時工用勸作  
亟濟斯成陳侯名耆壽官奉議郎以治最諸公  
交薦之六年二月望日記

會通礮 縣東二里大溪西因田患洪水故置礮

洩之

奉化縣志

卷之三

水利志

礮

芑

榆木礮 縣東一都

鎮東礮 縣東二都取資國堰水

新溪礮 縣東一都奉化鄉

資國礮 縣東南三都奉化鄉大溪之東元至治

元年馬稱德建

黃莊礮 縣南二十里金谿鄉

史家塘礮 縣東南十八都

青山礮 廟頭礮 縣南十六都金谿鄉承楊塢

水通十八都

陳埠頭礮 縣東三十里通江要道也潮水悍急

舟行時防覆溺

黃家礮 縣東三十二都

考到礮 縣東三十二都積奉化連山松林三鄉

之水溉田三千餘畝後圯元知州馬稱德修

湖芝礮 縣東三十二都溉奉化金谿二鄉田三

千餘畝元知州馬稱德重修明主簿羅良儕復

築

錢堰礮 縣東三十三都金溪鄉

奉化縣志 卷之三 水利志

礮

三

蔣家礮 縣北三十六都長壽鄉

王家礮 縣北三十六都長壽鄉又名劉大河礮

宋熙甯間里人王元章之祖創築建炎三年王

元章請於官復修之

進林礮 縣北三十六都長壽鄉水南出鎮亭北

入北渡江溉奉化長壽金谿三鄉之田東接鄞

之茅山鄞塘鄉西接鄞之小溪大江潮水所滙

立礮於此潦則洩之江旱則閉之以灌田蓋二

縣三鄉之所濟也上置石橋為甯紹台温驛道

紹興己丑令劉廷直以邑人吳琳言修築淳熙  
元年復修元延祐六年知州馬稱德又規水道  
更築始以石板甃橋礮旁有晉王長官與馬侯  
生祠置田二十畝俾土人掌之以備修造朝列  
大夫翁元臣記洪武中縣丞喬鑑修之正統初  
縣丞黃甯復修立石柱以表其額明翁元臣重  
修進林礮記昔蘇東坡有言陂湖河渠之類久  
廢復開事關興運蓋指鴻隙陂臨平湖而言也  
今四明奉化州距州治可一舍有所謂進林礮

奉化縣志

卷之三

水利志

礮

三

水源南出連山鎮亭北至定海縣入於海東接  
鄞之茅山鄞塘西入鄞縣小溪大江因三方潮  
汎所滙之地立礮閘通潮入溝渠河港流行散  
闊有數百餘里漑奉化長壽金谿三鄉旁及鄞  
田數千頃礮之功常見枯旱之時橋於礮上爲  
驛道抵台温通明越然不知礮創於何時頃於  
草莽間得重修進林礮碑下半截又於湍石間  
得上截之半字畫漫沒髣髴所載於前宋紹興  
年間劉廷直宰奉化邑人吳琳言其事且曰今



之進林礮如是則有礮舊矣又如元祐中舒龍  
學留題言兩縣三鄉之所取濟馬指常浦礮又  
不知亦有進林礮否也又參沈黃門修劉大河  
礮記云進林等礮實相須焉有符舒公兩縣三  
鄉之說則前有此礮明矣劉侯特修之也近於  
石罅得一石匣啓之乃藏佛經鎮怪上題云淳  
熙元年再修以鄞民不納水利而致遲緩乃知  
此時又復修矣歲月經久修而薦壞頽敗欹陷  
乘橋者凜然且不敢啓閉走泄水源民病之前

之爲政者於至元庚寅間亦嘗整治而礮底深  
險憚於事勢重大苟且目前攙扶甃砌無何而  
頽傾如昨廣平馬侯致遠來守是州見之惕然  
詢謀經營先將本渠前後礮閘稍有壅塞者疏  
之接山溪活水通江海汎潮民皆便之旣以竣  
事乃注意於此礮籌畫於中退食不寐命作壩  
以斷江湖之來旁疏水源入江列水車數十以  
去深不可出之水洞見基底鼃鼃爲害者犁其  
穴而驅之江候喟然歎曰是不難龍門伊闕可

鑿而排胥江怒濤一射便退掃往昔簡陋之弊  
築而新之乃計所用工力木石則以本州沾水  
利戶之上者隨力出備夫工則又以田產戶之  
次者每五畝出夫一名戶之下者一毫無擾若  
夫鄞之沾水合助力者以無相統攝故一戶不  
及侯之度量悉符石匣所載事蹟其有不敷者  
人皆相與維持樂助工食擇可勞而勞之因所  
利而利之遂成久遠之事此礮橫亘五丈二尺  
以直而幹者柱其上有六長一丈三尺有奇甃

堤以直其兩旁規模宏壯行道之人不知其爲  
險俾諳水利者董其役始於延祐庚申十月至  
治辛酉四月礮成其與劉廷直興工於丙寅冬  
閱五月乃成今之月日與昔同豈非事關興運  
乎江之澌潮不得嚙河之濬水瀦而不洩雨不  
至澇旱不至涸土糞而腴歲熟而獲秋風南畝  
穠稔連雲翳誰之力與侯之德也予客四明經  
從礮上及三十餘年徒發一慨一旦功成於賢  
州牧自非有大力量者疇克臻此民曰礮興民

之利礮廢民之疾今侯能除民病興民利較之  
太守馬臻創立鏡湖之功不在其下耆老竺大  
昌等謂余亦勸農者侯爲農用情如此可不述  
其事以傳不朽大昌等當磨石以待於是乎書  
至治新元四月記

銅山礮 縣北三十四都舊志唐乾甯中建一爲  
銅山前礮在銅山南一爲銅山後礮在銅山北  
朴木礮 吳山礮 下塘礮 大歐礮 俱縣北  
三十五都長壽鄉

奉化縣志

卷之三

水利志

礮

三

廣利礮 唐家礮 崑山礮 俱縣東北二十都  
金溪鄉

新堰礮 縣北三十七都長壽鄉承泉口水  
大馬礮 縣北三十七都長壽鄉名范公亭下水  
通三十九都

毛家石礮 縣北三十七都

常浦礮 縣北三十五都東界於鄞宋元祐中舒  
亶立石記之歲久又圯元至元十年本路經歷  
韓居仁申明水利重修之今又圯一名常平礮

柳公碶 縣北三十九都禽孝鄉通潮河溉田甚溥

周長官碶 縣北三十九都禽孝鄉通范家河北渡宋縣令周因置故名民爲立祠碶旁今爲周南廟

馬家碶 縣北四十一都

閘

普平港口閘 縣北十里卽斗門小閘

倪家碶閘 縣東北十里金鐘壑之東上爲溪流

奉化縣志

卷之二

水利志

閘

三

下爲江湖舊有碶障溪使不入江後爲洪水所敗水盡注於江而溪涸矣明嘉靖十年令錢璠改築爲堰使溪水入南渡河明季復壞推官黃端伯捐俸葺之董事非人中廢 國朝康熙三年知鍾有聞築之邑人宋禹志董其事經歲告成歲久洪水屢決左畔沙岸崩齧積漸成河雍正二年總制覺羅滿公身歷其地飭縣修葺令黃霽力任其事數月而竣舟楫之便灌溉之利咸賴之焉

進林小閘 在礮北

單家閘 縣北三十一都金溪鄉

蕁湖塘小閘 縣北蕁湖塘北

萬家河小閘 縣東北三十五里

奉化縣志卷三終

奉化縣志

卷之三

水利志

閘

三

